

nes oder vnvolkommenheit removierte/ vnd gleicher weiß zu der lezten Simplicitet der ersten Materiae reducirt vnd widerbrechte / vnd eben in solcher zeit oder weil ein andere neue form einführete/ nemlich des Goldts/ so ist sie noch nicht Perfect vnd vollkommen / wie es die Kunst erfordert. Zugleich weiß/ wann das Silber in seinem vrsprung vnd anfang nicht baldt wurde coaguliert/ würde sie mit ihrer form dar von rauchen/ vnd zumahl dar von fliegen. Auß welchem dann nun geschlossen / daß die zusammen gesetzte Metalla, als nemlich der Sulphur vnd Argentum vivum nicht bleiben vnder dieser form/ vnder welcher sie im anfang ihrer vermischung waren/ sondern sie würckten vnd liden stets ohn vnderlaß vnder einander / biß so lang auß ihnen ein Metallische form geboren wirdt. Vnd zum ersten zwar wirdt geboren ein form / eines vnvollkommenen Metalls / in welchem der Sulphur, der da ist das würckende/ noch nicht volkömlich von seiner Materi gescheiden ist/ die da ist Argentum vivum/ welches anzeigt ihr der Metallen feißtigkeit vnd verbrennigkeit. So aber die Digestion vnd kochung verharlich continuite biß ans endt/ so lang vnd viel / biß das würckende ganz vnd gar von seiner Materia separiert vnd gescheiden würde/ Als dann wirdt ein Neue form geboren/ die da ist die form des Goldes/ vnd ist die lezte vnd vollkomne/ vnd von der Natur anfänglich dahin intentiert vnd geneigt/ vnd diese Mineralia seindt zu sammen gefügt auß ihren Elementis, ja solchen Elementis, in determinierter quantitet vnd massen / der Natur zwar bekandt/ was aber ganz vnd gar nicht bekandt/ zumahl von anfang in einem Mineralischen ort vermischet / in welchem die Himlische krafft behalten wirdt.

Dahero dann die Natur obgenandte zwey Principia vom vrsprung oder anfang in gewissen Mensuren vnd gewichten mit vnflat vnd vnreinigkeit vermischet/ in ihren Mineren. Sie aber würckten vnd liden vnder einander zugleich durch kochunge / biß ins endt der Digestion der reine vnd ungekochte theil von seiner vnreinigkeit vnd vnflat gescheiden werde / als dann wirdt ein Metall darauß/ vnd je vollkommener das Metall gekocht ist/ desto weniger vnreinigkeit hatt es auch. Derhalben so die Digestion erfüllet ist/ als dann so wirdt Forma Agens, das ist der Sulphur ganz vnd gar von der Materi des Mercurii gescheiden. Dann von anfang ist der außwendige Sulphur dem Mercurio vnd der Natur zuwider / darumb gehet er nicht in sein Substanz vnd wesen/ wie die Materi: sonder würcket allein in den Mercurium, als in ein ding das da geschickt ist zu leiden/ vnd also verendert das verenderte/ vnd scheidet das Reine von dem unreinen: vnd nach langer Digestion vnd kochung bringet es die Materi zu der aller Edelsten simplicitet vnd einfache; vnd endtlich ziehet er de potentia Materiae ein form/ welcher dieselben